

Na osnovu člana 5., stav 2. Zakona o novčanoj podršci u primarnoj poljoprivrednoj proizvodnji ("Službene novine Tuzlanskog kantona", broj: 5/07 i 12/07), Ministar poljoprivrede, šumarstva i vodoprivrede u Vladi Tuzlanskog kantona d o n o s i

ODLUKU

o utvrđivanju kriterija o utrošku sredstava za novčane podrške u primarnoj poljoprivrednoj proizvodnji

I

Ovom Odlukom utvrđuju se opći kriteriji o utrošku sredstava za novčane podrške u primarnoj poljoprivrednoj proizvodnji u 2008 godini, po kojima fizička i pravna lica (u daljem tekstu: korisnici) mogu ostvariti pravo na novčanu podršku u primarnoj poljoprivrednoj proizvodnji.

II

Sredstva iz tačke I ove Odluke utvrđena su u Budžetu Tuzlanskog kantona za 2008 godinu, razdjel 14, glava 01, potrošačko mjesto 002 - "podrška primarnoj poljoprivrednoj proizvodnji" u ukupnom iznosu od 10.110.000,00 KM.

III

Opći kriteriji koje moraju ispuniti korisnici da bi ostvarili pravo na novčanu podršku su:

- da su evidentirani u Ministarstvu poljoprivrede, šumarstva i vodoprivrede Tuzlanskog kantona, odnosno općinskoj službi nadležnoj za poslove poljoprivrede, za obavljanje djelatnosti primarne poljoprivredne proizvodnje, odnosno prehrambene industrije na teritoriji Tuzlanskog kantona (u daljem tekstu: Kanton),
- da imaju prebivalište ili sjedište na teritoriji Kantona,
- da proizvode za tržište ili za potrebe vlastite farme ili da pružaju usluge na tržištu, vrše otkup, doradu, primarnu preradu, pakiranje poljoprivrednih proizvoda i slično,
- da se radi o pravnim licima koja su ispunila poreske obaveze,
- da ispunjavaju druge kriterije propisane Programom utroška sredstava za novčanu podršku u primarnoj poljoprivrednoj proizvodnji utvrđenih Budžetom Tuzlanskog kantona za 2008 godinu (u daljem tekstu: Program),
- da ispunjavanju uvjete propisane Pravilnikom o ostvarivanju novčane podrške u primarnoj poljoprivrednoj proizvodnji za 2008 godinu,
- novčanu podršku za oblast iz tačke IV c) i d) ove Odluke kada je u pitanju prehrambena industrija, imaju samo fizička i pravna lica koja se bave preradom biljnih i animalnih proizvoda iz primarne poljoprivredne proizvodnje proizvedenih na području Kantona.
- novčanu podršku za oblast iz tačke IV d) ove Odluke kada je u pitanju otkup poljoprivrednih biljnih i animalnih proizvoda proizvedenih na području Kantona koji služe za dalju preradu , imaju samo pravna lica,
- novčanu podršku za oblast iz tačke IV d) ove Odluke, pored lica navedenih u alineji 2. ove tačke imaju i povratnici koji su imali status izbjeglih lica na području Kantona,
- korisnici ne mogu ostvariti pravo na novčanu podršku za istu proizvodnju iz sredstava odobrenih Budžetom Federacije Bosne i Hercegovine i Budžetom Tuzlanskog kantona.
- da su u 2007 godini započeli sljedeće proizvodnje: Utovljena junad, vještačko osjemenjavanje plotkinja, proizvodnja pilećeg mesa,

- da ostvare neku od poljoprivrednih proizvodnji ili poljoprivrednu djelatnost iz tačke IV ove Odluke u periodu od 01.01. do 31.10.2008 godine na području Kantona.

IV

Sredstva novčane podrške iz tačke II ove Odluke utrošit će se u sljedećim oblastima:

- a) Biljna proizvodnja,
- b) Animalna proizvodnja,
- c) Kapitalne investicije u primarnoj poljoprivrednoj proizvodnji i prehrambenoj industriji,
- d) Regresiranje kamata za kredite za otkup viškova biljnih i animalnih poljoprivrednih proizvoda, proizvedenih na području Kantona i investicijske kredite u primarnoj poljoprivrednoj proizvodnji i prehrambenoj industriji,
- e) Podrška stručnim institucijama,
- f) Participacija u realizaciji projekata novih tehnologija od interesa za primarnu poljoprivrednu proizvodnju,
- g) Rezerve.

V

Raspodjela planiranih budžetskih sredstava utvrđuje se Programom koji donosi Ministar poljoprivrede, šumarstva i vodoprivrede uz prethodno pribavljeno mišljenje Komisije za poljoprivredu, vodoprivredu, šumarstvo i zaštitu okoliša Skupštine Tuzlanskog kantona.

VI

Ova Odluka stupa na snagu danom dobijanja saglasnosti od strane Vlade Tuzlanskog kantona, a bit će objavljena u "Službenim novinama Tuzlanskog kantona".

BOSNA I HERCEGOVINA
Federacija Bosne i Hercegovine
TUZLANSKI KANTON
Ministarstvo poljoprivrede,
šumarstva i vodoprivrede

MINISTAR
mr. Amir Hasić, dipl.ing.agr.

Broj: 04/1-14-1085/08
Tuzla, 22.02.2008 godine,